

# *NGE KWIKILA YAWU?*

 Mpe na ntawala beto sambila, mu zola tuba mutindu yayi, ti mazono na nkokila, mu banza ti ya vwandaka mazono, mu tubaka na mama mosi, “Kana nge lenda sala kaka mutindu beto me tuba na nge na kusala, ti mu lenda . . . bébé yina kele na kimbevo ya kuvimba ya yintu, yawu ke fiotuka.” Mpe yintu ya bébé yango fiotukaka, mazono na nkokila, centimetre mosi na ndambu na kutesaka na nsinga. Na yawu mama yango me kwisa na yawu awa ntangu yayi.

<sup>2</sup> Ntangu yayi, mu me sala yawu, mpangi-kento, samu na kikuma. Beno me mona? Kana nge me mona diambu mosi ya pwelele me salama, yina ke matisa lukwikilu ya nge na kutatamana na kukwikila yawu. Na bantangu yankaka mu ke salaka yawu samu, keba ve, mumbandu kulomba muntu yango na kutelema, kutula dikulu mosi to zole na ntawala, kuningisa diboko, kuningisa musapi ndambu na ndambu, kima mosi bawu lenda sala mutindu yankaka, ya ke kaka samu bawu zaba ti nionso yina me kuma mbote mingi. Ba ke kotaka na kidi-kidi mpe ba ke banza ti ya ke salama ve, kasi ya ke salamaka konso ntangu. Beno me mona? Ya ke salama kaka.

<sup>3</sup> Bantu yikwa zola ti ba bambuka bawu na kisambu, ntangu yayi? Beno lenda telemisa kaka maboko ya beno mpe kutuba, “Mfumu, pesa yawu”? Beto kulumusa bayintu ya beto.

<sup>4</sup> Mfumu, mutindu beto ke na kuwa mukunga yayi ya nene ya ntama ya dibuundi, yina nkundi ya munu ya ntalu sonikaka, Paul Rader, “Kwikila Kaka,” beto ke na kubanza ntangu yayi na mwana-bakala mosi, bibuti ya yandi nataka yandi na bilandi, kaka na manima ya bilumbu kumi na manima ya Yesu pesaka bawu ngolo ya kubasisa bampeve ya yimbi mpe kubelusa bambevo, mpe awa ba nungaka bawu ya muvimba na kimbevo ya épilepsie. Mpe bawu monaka Mfumu ya beto ke na kukwisa. Mpe tata kwendaka mbangu mpe tubaka, “Mfumu, wila beto mawa. Mwana ya munu ya bakala me yangisama mingi na mpeve ya yimbi. Mu me nata yandi na bilandi ya Nge mpe bawu me kuka ve na kubelusa yandi.”

<sup>5</sup> Yesu tubaka, “Mu lenda, kana nge me kwikila. Kwikila kaka.” O Nzambi, Nge me sobaka ata fiofi ve kubanda na ntangu yina: Nge ke kaka Nzambi ya zola mutindu mosi, ya mawete, mpe ya mawa. Mutindu Nge vwandaka ntangu yina, Nge ke mutindu mosi bubu yayi. Mpe Mfumu, mutindu tata yina, beto nionso me boka, “Mfumu, Sadisa kukondwa lukwikilu ya beto.” Ya ke na kukikulumusa mingi; beto ke bulaka kaka disakuba na yawu, Tata.

<sup>6</sup> Beto zola vutula na Nge matondo mpe lukumu samu nge simbaka bébé yina ya fioti mazono na nkokila, kumona ti mukwa yina ya yintu, yina vimbaka, samu ti, mukwa basikaka na nganda, ya fiotukaka na centimetre mosi na ndambu. Beto ke vutula matondo samu na yawu, Tata. Ntangu beto me zaba ti badokotolo ya beto ke na kima ya kusosa ve samu na yawu, ya ke na kima ve ba lenda sala samu na yawu; kasi Nge ke kaka Nzambi, Mfumu ya mambu nionso. Beto ke tonda Nge, Tata. Beto ke tonda Nge samu na kwikama ya mama yayi, mpe mawete, mpe bulemvo samu na kuvutula nsinga yango mpe kukangisa yawu na dititi yayi, awa, samu na kutalisa pwelele kimbangi ya yandi samu na nkembo ya Nzambi. Bika ti mwana ya yandi ya fioti kuzinga mpe kuvwanda mbote, samu na nkembo ya Nge.

<sup>7</sup> Tala maboko yina nionso ba me telemisa na zulu, Tata. Mosi na mosi ya bawu kele na nsatu. Mu me telemisa ya munu, mpe, Tata, mu ke na nsatu. Mpe ya ke na mingi awa, na mutindu ya mukanda to na kati ya bwati yayi, yina ke na nsatu, bantu yina ke na nsatu ya kieleka. Bika yawu salama ti, Mfumu, mosi na mosi ya bawu ke kuzwa lombilu ya bawu na nkokila yayi. Bika bawu baka kimbangi ya mama yayi mpe kaka mutindu mbandu mosi samu na kutalisa ti ntangu Nge me tuba kima mosi, ya me mana. Ya ke... Nge... Nionso beto fwana sala kele kundima yawu mpe kusadila yawu. Ya ke diambu yina me mana.

<sup>8</sup> Pesa yawu, Mfumu, ti mosi na mosi ya mikanda yayi mpe bamuswale yayi, ntangu ba ke tetika yawu na zulu ya bantu, bika bawu beluka. Bayina nionso me telemisa maboko ya bawu, Tata, bawu lenda kuzwa nsatu ya bantima ya bawu. Beto me lomba yawu, na Nkumbu ya Yesu. Amen. Beno lenda vwandwa.

<sup>9</sup> Mu zolaka talisa na beno kaka nsinga yango awa, yina mama yango (Yawu yina. Um-hum.)...yintu ya bébé yina fiotukaka mutindu Mfumu silaka beto na nzila ya Mpeve-Santu mazono na nkokila. Ya ke mbote ve? Na yawu, ya ke pesaka beto kikesa mingi samu na kuvwanda na lukwikilu mpe samu na kukwikila.

<sup>10</sup> Ntangu yayi, ntangu Yesu tubaka na yinti yina, na Marc 11:23, "Kubanda bubu yayi muntu mosi ve ke kudia diaka mbuma ya nge," mu banza ti Yandi bokaka ve. Na yina, ya kieleka, Yandi salaka yawu kukondwa mpasi, na mutindu ti bilandi ya Yandi...Mu banza ti mosi na kati ya bawu kuwaka Yandi. Mpe yawu...Ntangu muntu yina ya kimbevo ya épilepsie, ntangu yandi kwisaka na ntwala ya Mfumu Yesu, mwana-bakala yango konaka na mutindu ya me konaka ntete ve; mbala yankaka, yandi bwaka na ntoto mutindu mvumbi, kasi yandi monaka ti yandi me kutana na Muntu Yina vwandaka na lukwikilu ya zulu mingi kulutila bantumwa yina.

<sup>11</sup> Ntangu yayi, mu zola ti muntu yina ke kwikilaka ve na kubeluka ya Kinzambi na kutala yayi. Yesu pesaka bawu ngolo ya kubasisa bampeve ya yimbi, mpe bawu nungaka ve. Ya ke

ngolo ve yina nungaka ve, kasi ya ke bawu yina nungaka ve. Yesu tubaka na bawu:

“Samu na yinki beto lendaka basisa yawu ve?”

Yandi tubaka, “Samu na kukondwa lukwikilu ya beno.”

<sup>12</sup> Dibuundu kele na ngolo. Nzambi me katulaka ngolo ya Yandi na dibuundu ata fioti ve, kasi dibuundu ke na lukwikilu mingi ve samu na kusadila yawu. Yimeni. Ya ke mpasi ve. Beto ke meka na kukumisa yawu mpasi mingi bantangu yankaka, kasi kulutila beno sala Nsangu mbote kima ya kukondwa mpasi, kulutila ya ke kuma kima ya kieleka samu na beno, ntangu beno ke kuma kieleka ya kukikulumusa na yawu: Nzambi me tuba mutindu yina; yina me sukisa diambu; mpe yimeni. Mpe kwikila yawu kaka, kwenda na ntwala.

<sup>13</sup> Ntangu Yesu tubaka, “Muntu mosi ve kudia mbuma ya yinti yayi,” mpamba ve, matiti vwandaka kaka kitoko mpe ya mubisu mutindu ya vwandaka ntete. Mpusu vwandaka mutindu mosi, kasi kuna na nsi ya ntoto na bansimbulu yango, lusingu bandaka na kukwenda.

<sup>14</sup> Na yawu ya vwandaka mutindu yina samu na cancer, samu na kimbevo ya mutindu nionso yina—yina beno lenda banza. Ntangu nge lenda ndima Ndinga ya Nzambi, kuna na nsi na bansimbulu ya yawu, cancer lenda vwanda kuna; diboko ya nge lenda vwanda ya kukangama. Yina me tala kubeluka ya Kinzambi ve. Ya ke, “Kana nge lenda kwikila.” Beno me mona? Kisika mosi kuna na nsi, ya me banda dezia kisalu.

<sup>15</sup> Yesu tubaka, “Kana beno me tuba na mongo yayi, ‘Katuka awa,’ mpe beno me tula ntembe ve na kati ya ntima ya beno, kasi beno me kwikila ti yina beno me tuba ke salama, beno lenda kuzwa yina beno tubaka.” Ya ke kitoko ve? Yina me katuka na Nani? Mwana ya Nzambi, yina Bandinga ya Yandi... Zulu na ntoto ke luta, kasi ntangu yayi... kasi Bandinga ya Yandi ke luta ve.

<sup>16</sup> Ntangu yayi, mutindu mosi kaka beno lenda sala yawu, beno fwana vwanda na kikuma ya mbote mpe mitifi ya mbote. Ntangu yayi, kana mu kwisa awa mpe mu tuba, “Mu ke talisa na beno ti mu lenda katula mongo yayi, ‘Katuka awa, mongo.’” Ya ke katuka ata fioti ve. Ata fioti ve. Ata ti mu vwandaka na konso kima yina. Ya ke lomba ti ya vwanda... Ya ke lomba ti kusosa luzolo ya Nzambi.

<sup>17</sup> Yawu yina, ntangu nionso na bandonga ya bisambu, mu—mu ke vwandaka na diambu ya mpasi, ya ke samu kima mosi me salamaka na bandonga mpe nionso yina, ya ke kuna kisika diambu yango ke salamaka diaka. Kasi beno me mona, kana beno nge na disumu yina beno me fungunaka ve... Beno me monaka yawu ntete ve diambu yango, na ntwala mu lomba na mpeve ya yimbi na kubasika? Mu ke talaka diambu yango mbote—mbote na mutindu ti mu ndima ya kieleka ti ya ke na kima mosi

ve na luzingu yango yina lendaka sala ti diambu kusalama ve, beno me mona, samu beno bambuka moyo, na makabu yayi, beno lenda kuzwa mindondo na yawu.

<sup>18</sup> Nzambi, beno ke bambuka na ntangu mosi, pesaka profete mosi . . . salaka muntu mosi profete, Moise, mpe tubaka na yandi na kukwenda kuna, samu na kutuba na ditadi. Mpe profete natamaka na makasi, mpe ya kwendaka kuna, mpe bulaka ditadi, samu na kutalisa kulemba ya Klisto, ti Yandi fwana kufwa mbala zole to kubulama mbala zole. Yandi vwandaka na ngolo ya kubasisa yawu, kasi ya vwandaka luzolo ya Nzambi ve.

<sup>19</sup> Mu lenda kwikila ve ti ya vwandaka luzolo ya Nzambi samu na Elisée na kukwenda kuna, samu bana yina vwandaka seka yandi samu yandi vwandaka na dibandi, mu banza ve ti yandi zolaka salam utindu yina. Kasi yandi vwandaka profete, mpe yandi bakaka makasi, mpe yandi singaka bana yango mpe balusu zole ya bakento kufwaka bana makumi yiya na zole yina kuzaba diambu ve. Beno me mona? Kasi mu ke kwikila ve ti ya lendaka sala mutindu yina. Mpe ya ke kaka—kaka . . . beto . . .

<sup>20</sup> Nzambi, mu ke kwikila ti bubu yayi, na ntwala Yandi pesa ngolo na dibuundi ya Yandi, Yandi kemekaka dibuundi ya Yandi samu na kutala yina ya ke sala.

<sup>21</sup> Beto . . . na ntangu ke kwisa, mbala yankaka, kana Mfumu me zola ntangu mu ke vutuka, beto ke kuzwa ntangu samu na kutubila mingi diambu ya mutindu yina, samu na diambu yina zola kusalama, na yawu beto ke zaba mingi samu na yawu na ntangu yina.

<sup>22</sup> Kasi kana beno lenda tuba ndinga mosi, beno tuba, “Mfumu, mu me kwikila yawu,” beno tula ntembe ve, beno tuba yawu na kati ya ntima ya beno . . .

<sup>23</sup> Ntangu yayi, beto tuba mumbandu, mu vwandaka na lubwaku, mpe mu kele ve . . . mu ke na kulonga na ba-million ya bantu, kasi kuna na simu yankaka ya mongo, kele na kimvuka ya bantu nkama mosi, mpe ba ke na kufwa kukondwa kuzaba Klisto. Mbote, mu ke longa na million ya bantu awa, kasi ata mutindu yina, Kima mosi na kati ya ntima ya munu ke na kutuba na munu, “Kwenda na bantu yina kuna na simu. Kwenda kuna. Ba ke na kufwa.” Mu ke zola ve kukwenda munu mosi, kasi ata mutindu yina ya ke na Kima mosi na kati ya munu. Beno me mona, na ntangu yina ya ke Nzambi, ke na kusala. Beno tala yina kikuma yina beno ke na yawu, beno tala mitifi yina ke tinda beno na kukwenda, beno mosi ve . . . Ntangu yayi, kana mu me tuba, “Mbote . . .” Kana kikuma ya munu kele ya mbote samu na kukwenda kuna, kasi ntangu mu me kuma kuna mpe mu me mona mongo mosi ya nene, mu tuba, “Beno zaba, kana mu luta na zulu ya mongo yina mpe mu vulusa bankama ya bantu yina nionso, kilumbu mosi ba ke sala kiteki mosi kuna: Mpangi

Branham, missionnaire ya nene.” Ntangu yayi, mitifi ya munu kele ya mbote ve. Mongo ke kubwa ve. Ve, tata.

<sup>24</sup> Kasi ntangu mitifi ya munu mpe kikuma ya munu kele mbote, mpe Nzambi na kati ya ntima ya munu ke na kutwadisa munu, mpe mu lenda luta na zulu ya mongo ve, na lweka ya mongo, na nsi ya mongo, mu ke tuba, “Mongo, katuka.” Mbala yankaka yawu... Ntangu mu me tuba mutindu yina, mpe mu me tuba yawu kaka na mpeve yina ya mbote, mu me twadisama na Mpeve-Santu, na luzolo ya Nzambi, ata lutu mosi ve ya ntoto ya mongo ke katuka, kasi yawu kele na nzila. Na kilumbu ke landa ya lenda vwanda na kilo mosi ke kubwa. Na kilumbu ke landa ya ke vwanda na tonne mosi na zulu ya yiya. Mpe mbala yankaka na ngonda mosi, ba-tonne tanu ke kubwa. Yinki yina? Mbala yankaka ya lendaka monana ata fioti ve, kasi ya ke na kukatuka, yawu kele na nzila. Mu ke telema kaka kuna mpe mu ke tala diambu yango kusalama, samu Nzambi me tuba mutindu yina mpe yina me sukisa diambu.

<sup>25</sup> Nge lenda banza na mama ya nge na nkokila yayi? Mbote mingi, kana nge lenda banza yawu, yandi ke kuma mbote. Mbote mingi. Yina ke kana nge ke kwikila yawu: tuba ndinga mosi mpe bikala na yawu. Beno me mona? Kwikila yawu; kangama na yawu. Ya ke Luzingu ya Kukonda nsuka.

<sup>26</sup> Ntangu yayi, mbasi na manima ya midi... Mu tubaka na Billy, na nkokila yayi, ti yandi kabula ve bakalati ya bisambu, samu mu zolaka tuba. Mu ke na kutuba, ya kieleka, ti kubanda Ngonda ya ntete mu ke na kukwenda, na bayinsi yankaka, mpe kuvutuka, na Phoenix, kukwisa na yinzo, mpe kuvutuka, mpe nionso yina (kuswasikisa mabanza yango) tii kuna mu ke lemba mingi na mutindu ti mu ke zaba ve mbala yankaka kisika mu kele. Ya ke lembisa munu mingi.

<sup>27</sup> Na manima, mu fwana kwenda, mpe bawu... beno—beno bampangi bokilaka munu diaka na kubikala samu na mwa bilumbu. Mu me sepela na yawu mpenza. Ya kieleka mu banza ti yayi ke nkonga ya balongi ya mbote mingi. Mu zolaka ti beto vwanda diaka na mwa ntangu mingi ya ngwisani ya bampangi. Kana Mfumu kuzola, mu ke vutuka na ntangu yankaka. Kima yankaka ve, mu ke kwenda kaka na dibuundu mosi na yankaka mpe kutambula na kati ya mbanza mpe kutala beno nionso. Mu ke sepela kusala mutindu yina: kusala yina mu lenda sala samu na kusadisa Kimfumu ya Nzambi, ya zola tuba, kana beno zola ti mu sala yawu. Mpe kuyutuka kilumbu mosi mpe kuvukana na beto samu na kuwanda na lukutakanu ya kitoko, ya mbote kisika mosi kuna.

<sup>28</sup> Mpe beno bambuka moyo, bampangi, mu ke sambila samu na beno. Yina ke ya kieleka. Mpe mu zola ti beno nionso kusambilu samu na munu, beno nionso.

<sup>29</sup> Mpe ntangu yayi mu—mu ke . . . Mbasi na suka ke vwanda na balukutakanu ya mabuundu na bayinzo-Nzambi yayi nionso ya kitoko na kati ya mbanza.

<sup>30</sup> Ntangu yayi, bantu yankaka ya Jeffersonville kele awa. Bankundi ya munu yankaka, mosi ya ba-administrateur ya munu ya yinzo-Nzambi, kele awa, Mpangi Fred Sothmann. Mu me zwaka ntete ve ntangu ya mbote ya kumona yandi na lukutakanu. Mpe mpangi-bakala . . . Oh, mingi ya bankundi ya munu yankaka kuna na Jeffersonville, ya munu mpa- . . . secrétaire ya munu kuna mpe—mpe bayayi nionso kele awa, kisika mosi kuna na lukutakanu. Mu me monaka bawu ntete ve.

<sup>31</sup> Mpe bampangi, ya ke na mwa mabuundu ya kitoko awa na kati ya mbanza yayi. Mpe na beno banzenza yankaka nionso me bikala, beno sosa mosi na kati ya yawu mpe beno kwenda na bayinzo-Nzambi yayi mbasi. Ya ke sala beno mbote, mu me ndima yawu. Ba ke bampangi yina ke kwikilaka na ministere ya mutindu yayi. Yawu yina bawu me vwanda awa na kisika ya malongi mpe na bisika yayi awa na nsi, samu bawu ke kwikilaka yawu. Mpe mu ke sepelaka na bantu yina.

<sup>32</sup> Mfumu, sakumuna kimvuka yayi awa ya Bantu ya Mumbongo ya Nsangu ya mbote ya Muvimba yina—yina simbisaka lukutakanu yayi. Ya ke . . . Mu ke kwikila ti ya vwandaka mbote, bayina simbisaka lukutakanu. Mu—mu ke kwendaka na mingi ya bansimbisi yango, samu kuna na kati . . . Beto lenda vwanda mutindu yayi ve, kasi mbala mingi, bampangi ke bikaka mwa baluswaswanu ya mpamba-mpamba: mumbandu muntu mosi ke kwikilaka mwa *kima mosi*; yankaka, mwa *kima mosi*; yina ke butaka mwa mindondo mpe ya ke zubulaka mwa bamputa ya ntama; ya ke lomba ti yawu kawuka na bilumbu yayi, kasi yawu—yawu . . . Mpe kana beno, to, kana mu ke na Bantu ya Mumbongo ya Nsangu ya mbote ya Muvimba, yina ke sadisa fioti na kuvukisa yawu, mpe beto ke vukana, mpe beto ke vwanda na ngwisani ya kieleka kintwadi, bantangu ya mbote ya kieleka. Mpe beto ke sepelaka na yawu. Nzambi kusakumuna kimvuka yango. Mu ke kwikila ti Nzambi telemisaka yawu na kikuma mosi.

<sup>33</sup> Ntangu yayi . . . na manima mu kuzwaka ntangu ya mbote ya kumona kisika ya Mpangi Oral Robert kilumbu yina. Mpe oh, la la, kisika ya nene mpenza, kima mosi ya kitoko. Ya ke—ya ke lubambuku ya Pentecote.

<sup>34</sup> Na manima mu kwendaka na kisika ya Mpangi Tommy Osborn, kisika yankaka ya mbote, muntu ya mbote ya Nzambi, yina . . . Munu na Mpangi Tommy kele ya kukangama mingi, na Mpangi Oral, diaka, bampangi-bakala ya kukangama mingi, mpe beto ke zolanaka mosi na yankaka, mpe beto ke mekaka na kusala nionso yina beto lenda sala samu na mambote ya bantu na kati ya Kimfumu ya Nzambi.

<sup>35</sup> Na yawu ya kieleka mu ke sepelaka na bantu yayi na kuvwanda awa na mbanza yayi na kati ya bantu yankaka yayi ya mbote beno ke na bawu. Beno mameme kele na bamvungi ya mbote. Mu ke tuba yawu kaka, mutindu yina. Bika ti Mfumu kulandila kaka na kuvwanda na beno nionso yawu yina kisambu ya munu. Mpe ntangu yayi mbasi na manima ya midi, munu... Yinki ntangu lukutakanu ke banda, bampangi? Na ngunga ya kumi na yiya na minuti makumi tatu. Beto tuba na ngunga kumi na tatu—kumi na tatu to na ngunga kumi na tatu na minuti makumi tatu beno fwana vwanda awa na mutindu ti ba ke zenga ve balukutakanu yankaka.

<sup>36</sup> Ntangu yayi, kana bana-bakala me tuba na beno ntete ve, na nkokila yayi ba ke na mwa babuku, bafoto mpe nionso yina, mpe ba—bande, mpe ba-diske, mpe... ya balukutakanu, mpe bawu ke tekaka yawu. Kasi beto ke bika bawu teka yawu ve na Saba, mbasi. Ata buku mosi ve to kima yankaka ve ba ke tekisa mbasi. Na yawu beto ke zola ve... beto ke pesaka yawu nzila ata fioti ve. Ata ti bantu mingi ke tubaka, “Nge ke na kifu mpenza...”

<sup>37</sup> Mpe kiboba ya Tata Bosworth vwandaka tuba na munu, “Oh, Mpangi Branham, nge ke na kifu kisika yina,” kasi ya ke mutindu yina mu me twadisama (beno me mona?), mpe mu—mu me twadisama. Kana beno zola mosi, ba ke pesa beno mosi, kasi kana beno... Kasi beto lenda teka ve na—na Saba. Ve. Yimeni. Kana mu me kwikila yawu, mu fwana zingila yawu, kaka... Mu fwana zingila yawu munu mosi. Beno me mona? Mpe mu—mu fwana zingila yawu na na mambu mu ke ndimaka mpe na yawu... To beno lenda bokila beto, mpe, kuluta na yinzo, kukwisa na kisika yango samu na kubaka yawu.

<sup>38</sup> Ntangu yayi na nkokila yayi, oh, beto zimbana beto nionso ti, oh, beto ke na kisalu ya kusala, to kima yankaka, to bampasi ya kilumbu. Beto tula mambu nionso na lweka, mpe beto tala na Ndinga na mwa minuti fioti, mpe beto tala yina Nzambi ke tuba na beto na nzila ya Ndinga ya Yandi. Mpe ke sambila ti Nzambi kupesa beto lusakumunu ya nene mingi na nkokila yayi.

<sup>39</sup> Gene, nge lenda katula yandi samu na munu? Nge lenda katudila munu mwana-kento yina? Ya ke mwana-kento ya kitoko mutindu yina ve? Nge lenda vutuka na munu na yinzo samu na kusakana na mwana ya munu Sara, ya ke na yinda mutindu *yayi*? Oh, nge lenda? Mu—mu ke zola mutindu yina samu na nge. Yandi ke na yinda pene-pene na nge, mpe yandi ke mwana-kento ya Papa. Um-hum. Hum. Mpe mu me ndima ti nge—nge ke zolaka mpe Papa ya nge, mutindu yina ve? Mama? Oh, ya kieleka nge ke zolaka yandi. Mwana-kento ya kitoko, mu me vwanda awa, mu ke na kutala yandi. Mwa meso ya fioti mutindu mwa mabulu ya kutobuka na bulanketi na—na mwa bansuki ya ndombe.

<sup>40</sup> Mu ke zolaka bana ya fioti. Mu ke na bana ya bakento zole na yinzo. Mosi ya bawu kele Rébecca mpe mosi yankaka kele Sara.

<sup>41</sup> Awa ntangu mingi ve, mu vwandaka ntama. Bawu zole kele mwa bana-bakento ya Papa, beno zaba, mpe mu ke zolaka bawu. Mpe na ntangu nionso mu ke vutuka mu ke tula bawu na mukongo, mpe...kasi Becky me kuma nene mingi samu na yawu; yandi me kuma nene mutindu mosi na munu. Ntangu yayi yandi ke buka mukongo ya munu; yandi ke...kasi ya ke kaka mwana-kento ya Papa, na mutindu nionso. Mpe ntangu yayi, pene ya mvula mosi, beto zola tula na lukolo ya Biblia kisika mosi kuna mpe ntama na lukolo ya leta.

<sup>42</sup> Na yawu, ba bikalaka ya kutelema samu na kuvilingila Papa, beno zaba, samu ya vutuka na yinzo. Mu vwandaka ntama samu na lukutakanu. Mpe mbasi na nkokila ba ke vingila munu tii na kati-kati ya mpimpa kana mu ke vutuka. Mpe na yawu, mu vutukaka na suka-suka na suka yina, pene ya ngunga tatu to yiya. Mama kwisaka na kielo mpe kotisaka munu, mpe mu vwandaka ya kulemba mpe ya kulemba mingi mpenza, munu... Awa na kisika ya malongi, Munu...ntangu...beto ke waka mbote na nsi ya kupakulama, kasi ntangu yawu ke bika nge, ya ke na ntangu yina mpasi ke bandaka. Bantu yikwa me zaba yawu? Mpamba ve, ya kieleka ya ke vwandaka mutindu yina.

<sup>43</sup> Beno tala. Elie kwendaka na zulu ya mongo mpe yandi bokilaka tiya na zulu, yandi bokilaka mvula na zulu, mpe na manima ntangu Mpeve bikaka yandi, yandi zietaka na kati ya ntoto ya kuyuma bilumbu makumi yiya mpe Nzambi monaka yandi, ya kubumbama na kati ya caverne kisika mosi kuna.

<sup>44</sup> Jonas, yandi kulumukaka kuna na nsi mpe bikalaka kuna bilumbu tatu mpe bampimpa tatu na kati ya kivumu ya baleine, ya lukaka yandi na lweka ya masa mpe yandi kwendaka longa. Mbanza ya muvimba balulaka ntima mpe kwisaka na Nzambi. Mpe ntangu kupakulama bikaka yandi, yandi kwendaka na zulu ya mongo mpe lombaka na Nzambi na kubaka luzingu ya yandi. Beno me mona?

<sup>45</sup> Mu telemaka na lweka ya ntoni ya William Cowper, ntama mingi ve, yina sonikaka mukunga yayi beto ke sadilaka na ntangu ya mbundana ya beto:

Kele na Kiziba mosi ya kufuluka na Menga,  
Yina basikaka na misisa ya Emmanuel,  
Na ntangu bansumuki ke kota na kati ya  
menga yina...

<sup>46</sup> Beno me waka yina yandi...salamaka na yandi? Na ntangu lutwadusu ya kimpeve bikaka yandi, yandi sosaka nzadi mosi samu yandi kukifwa.

<sup>47</sup> Mu ke zingaka na simu yina ya Yinzo ya Ntama ya Kentucky. Mpe Stephen Foster pesaka Amerique mikunga ya kitoko mingi yina zabana mingi yina ba ke yimbaka. Mpe ntangu yandi

vwandaka sonika yawu, lutwadusu ya kimpeve vwandaka kwisa, lutwadusu ya kimpeve yango, yandi vwandaka sonika mukunga, na manima ntangu yandi basikaka na yawu, yandi vwandaka kwenda kulawuka malafu. Na nsuka-nsuka, yandi bokilaka kisadi mosi mpe yandi bakaka lutebo mpe yandi kukifwaka.

<sup>48</sup> Bantu kuzaba ve yina ke kutanaka na yawu bantu yina ke zingaka na kitezo ya kimpeve. Ntangu yayi *awa*, beno ke na kuwa nsatu ya kukatula mongo mosi. Kasi kana kupakulama me bika beno, mpe beno me banda na kuluta kielo yina (kana muntu ya kukanga beno kele ve, beno me mona) na yina, mbala yankaka na mwa bangunga, na mpasi, beno ke zaba kisika beno kele. Na yawu nkokila na manima ya nkokila, ya ke lomba na nge na kusala mambu ya kulutila mbote.

<sup>49</sup> Mpe mwa . . . Mu zola tuba na beno samu na Sara na Rebecca ya leke. Na yawu na suka yina landaka, mu lendaka lala ve, mu telemaka, mpe mu vwandaka na kiti, mpe na manima ya mwa ntangu fioti Becky, yina vwandaka mbuta, yandi vwandaka—yandi vwandaka na makulu ya yinda mingi kulutila Sara, mpe na yawu Becky kwisaka mbangu . . . yandi vumbukaka na mpongi, yandi dumukaka na mbeto, kukondwa yandi telemisa leke ya yandi ya kento, mpe yandi basikaka na mbangu nionso mpenza, na kati ya yinzo. Yandi vwandaka tuba, “Papa, Papa . . .” Mu basisaka dikulu mosi, mpe yandi dumukaka na zulu ya yawu, ya kusikama mbote-mbote. Ya ke mutindu dibuundi ya bilumbu yayi, beno zaba, yawu me sala mambu mingi na ntangu ya yinda, beno zaba, na bamvula nkama. Yandi lenda kukisikimisa mbote-mbote, mpe yandi ziungisa maboko ya yandi na zulu ya munu mpe kutuba, “Oh, Papa ya munu, Papa ya munu . . .”

<sup>50</sup> Mpe samu na makelele, Sara ya leke, kuvumbukaka na mpongi. Mbote, mu zaba ve kana bana ya beno ke salaka yawu, to ve; ya munu ke salaka yawu: yina ya leke ke bakaka bilele ya ntama yina yaya me bikaka. Mpe na yawu Sara vwandaka lwata ba-pinzama ya Becky, makulu ya yawu vwandaka fioti ya yinda mingi, beno zaba. Mpe yandi kwisaka awa, mwana-kento ya leke mingi, ke kubwa, kubula masakuba. Mpe yandi kumaka kuna, na mwa nsukinina. Na yawu Becky balukaka, yandi tubaka, “Sara, mpangi ya munu ya kento, mu zola tuba na nge kima mosi.” Yandi tubaka, “Mu me kuma awa muntu ya ntete. Mpe mu me baka luyalu nionso. Na yawu mu me baka Papa ya muvimba mpe ya ke na kima diaka ve me bikala samu na nge.”

<sup>51</sup> Ya ke mutindu yina bantu yankaka ke banzaka samu na nsambulu, mutindu yina ve? Uh-huh. Ya kieleka.

<sup>52</sup> Mpe Sara yayi ya leke, yandi kitisaka mwa kikobo ya yandi, mpe yandi talaka munu na mwa meso ya yandi ya ndombe, mpe yandi bandaka na kudila. Mpe Becky kangamisaka ditama ya yandi na ya munu, yandi kangaka munu ngolo. Mu ke zolaka yandi. Mpe Sara bandaka na kukwenda ntama samu Becky

bakaka muvimba ya Papa. Mu basisaka dibolongo yankaka mutindu *yayi* mpe mu talisaka yawu na yandi mutindu *yayi*. Oh, yandi bakaka kikesa na nswalu nionso mpe yandi kwisaka mbangu, yandi dumukaka na zulu ya dibolongo ya munu na yawu... Yandi vwandaka kuna ntangu ya yinda ve mpe makulu ya yandi lendaka niata na ntoto ve. Ya vwandaka tenga-tenga (mbala yankaka, mutindu mu kele, mwa kutenga-tenga, beno zaba), mpe yandi lendaka ve...ya lendaka niata na ntoto ve. Yandi vwandaka denomination ya nene ve, beno zaba, mpe na yawu yandi lendaka vwanda ve na ntoto ya ngolo. Yandi vwandaka kuna ntangu ya yinda ve.

<sup>53</sup> Mpe na yawu, yandi vwandaka tenga-tenga mwa fioti, mpe mu losaka maboko ya munu na yandi mutindu *yayi* mpe mu kangaka yandi ngolo, mpe yandi ngengisaka mwa meso yina ya ndombe, mpe yandi balulaka meso na Rebecca. Yandi tubaka, "Rebecca, mpangi ya munu ya kento," yandi—yandi tubaka, "ya lenda vwanda ya kieleka ti nge me baka muvimba ya Papa, kasi mu zola ti nge zaba kima mosi: Papa me baka muvimba ya munu." Na yawu...

<sup>54</sup> Ya kele... Na mutindu ti Yandi me baka munu ya muvimba. Mbala yankaka mu me longakaka mingi ve samu na kutubila mambu ya nene, kasi na ntangu nionso mu me zaba ti Yandi me baka munu ya muvimba, na kutenga-tenga ya munu, bika ti Yandi yamba munu na maboko ya yandi zole, ya ke sala ti munu kuwa mbote.

<sup>55</sup> Mbote, bika beto sambila yandi mwa fioti diaka na ntwala beto zibula Ndinga.

<sup>56</sup> Ntangu yayi, Tata ya Mazulu, beto me bakula ti beto kele mutindu bana ya fioti. Mpe—mpe Nge ke zolaka kuvwanda na beto, mpe kusambilila na beto. Mpe na ntangu beto ke sambila Nge, mpe Nge ke zolaka beto, mpe ke simbaka beto na maboko ya Nge, mpe ke tindaka Mpeve-Santu ya Nge, mpe ke sala ti beto zaba ti Nge ke na kuzinga mpe Nge ke Tata ya beto, beto ke tonda Nge mingi. Ntangu yayi, bika ti Mpeve-Santu kukwisa na beto na nkokila yayi. Zola konso ntima, Mfumu. Pesa beto lusakumunu ya malu-malu. Mwangisa na zulu ya beto matanga ya malulu ya mawa, Tata. Kutala masumu ya beto ve. Yawu kele mingi mpenza. Mfumu, lemvokila yawu. Zimbara yawu, Tata, mpe baka beto kaka na maboko ya Nge, mpe—mpe belusa bimbevo ya beto, mpe—mpe sukula miyo ya beto, tula bampeve ya beto na kimpwanza, Mfumu, ti beto lenda sambila mpe kumisa Nge, beto vwanda mutindu bana ya fioti ke na kubaka mbangu na yinzo, na kuzabaka kaka ti Papa ke na kukeba beto. Pesa yawu, Mfumu.

<sup>57</sup> Ntangu yayi, muntu mosi ve ke na kiyeka ya ku—kutendula Ndinga. Beto me zaba yawu. Jean monaka Buku na diboko ya kibakala ya Yandi yina vwandaka na zulu ya kiti ya kimfumu,

mpe ya vwandaka na muntu mosi ve na zulu, to na ntoto, to na nsi ya ntoto yina vwandaka ya kufwana na kubaka Buku samu na kuzibula yawu, to kubuka bidimbu. Mpe Mwana-dimeme basikaka, yina kufwaka na ntwala yinza kuvwanda. Mpe Yandi vwandaka ya kufwana. Mpe Yandi bakaka Buku, mpe bukaka bidimbu, mpe zibulaka Buku. O Mwana-dimeme, kwisa na nkokila yayi. Zibula Buku samu na beto, Tata, mutindu beto ke tala na Nge, samu beto ke lomba yawu na Nkumbu ya Yesu, Mwana-dimeme ya Nzambi. Amen.

<sup>58</sup> Mu soolaka, na nkokila yayi, mwa nzila ya Masonuku awa ya bampova tatu. Kasi ntete mu zola kutanga nzila mosi to zole na buku ya Santu Jean, kapu 11 kubanda na nzila ya 23.

*Yesu tubaka na yandi, Mpangi ya nge ya bakala ke telema diaka.*

*Marthe tubaka na yandi, Mu zaba . . . yandi ke telema diaka na mvumbukulu na kilumbu ya nsuka.*

*Yesu tubaka na yandi, Mu ke mvumbukulu, mpe . . . luzingu: yandi yina me kwikila na munu, ata ti yandi me kufwa, yandi ke zinga:*

*Mpe yandi yina ke zinga mpe me kwikila na munu ke kufwa diaka ve. Nge kwikila yawu?*

*Yandi tubaka na yandi, Yinga, Mfumu: Mu ke kwikila ti nge kele Klisto, Mwana ya Nzambi, yina ke kwisa na yinza.*

<sup>59</sup> Mpe samu na dilongi mu zola sadila bampova yayi tatu: *Nge Kwikila Yawu?*

<sup>60</sup> Mu tangaka disolo mosi na ntangu me luta. Mu banza ti yawu vwandaka disolo ya kieleka ve. Mpe mbala yankaka balongi nionso, mu banza, me tangaka buku ya Docteur Ingraham's ya—ya *Mwana Ya Ntinu Ya Yinzo Ya David*. Ya ke buku mosi ya kitoko. Ya ke, mu banza, ba ke basisaka yawu diaka ve na masini. Mu zolaka ti mu vwanda na yawu na buku, na yawu mu lendaka talisa yawu na bantu.

<sup>61</sup> Mpe kuna na kati, mu vwandaka tanga mwa kima mosi ya fioti samu na Lazare, mpe samu na Yesu, mpe Marie, mpe Marthe, ti, bampangi ya Lazare ya bakento. Mpe kuna na kati mu vwandaka tanga kisika Yesu zingaka, mu banza, na Marthe mpe Marie. Bawu zole vwandaka bana-bakento ya kitoko ya ba-Hebreux. Mpe Lazare vwandaka longuka to ba vwandaka longusa yandi na kuvwanda musoniki na tempelo, samu na kusonika mikanda ya musiku ya banganga-Nzambi.

<sup>62</sup> Mpe Yesu vwandaka na ngwisani ya kieleka, mingi-mingi na Lazare. Ntangu beto me tanga na buku kisika Yandi kwisaka na yinzo ya bawu, mpe Marthe vwandaka na mwa kulemba samu na kuwa bandinga ya Yandi, kasi yandi kukubikaka madia ya midi mpe yandi yidikaka mesa, kasi Marie vwandaka na

makulu ya Yandi. Mpe Yesu tubaka ti Marie soolaka bima ya kulutila mfunu.

<sup>63</sup> Na yawu, ba me tuba na beto ti Lazare vwandaka yina nataka Yesu na Jean, na kati ya babuku ya Docteur Ingraham's, mpe...na *Mwana Ya Ntinu Ya Yinzo Ya David*. Mpamba ve, ya lendaka vwanda ya kieleka ve, mu zaba ve, kasi ya ke samu na kubaka dibanza ya yawu, kasi ya monanaka ti Yandi vwandaka zinga na bawu.

<sup>64</sup> Ntangu yayi, beto ke longuka yayi na ntwala, na sabala yayi me luta, mpamba ve, ti Yesu tubaka na Santu Jean 5:19, "Munu... Mwana lenda sala kima mosi ve na Yandi mosi, kasi yina Yandi ke mona Tata ke na kusala: Mwana mpe ke sala yawu mutindu mosi. Tata ke na kusala kisalu mpe Mwana ke na kusala mutindu mosi." Beno me mona? "Yina Yandi ke mona Tata ke na kusala."

<sup>65</sup> Na yawu samu na kukumisa yawu disolo ya kieleka, Tata, Nzambi, fwana tuba na Mwana ya Yandi, Yesu, mpe kutuba, "Nkundi ya nge, Lazare, ke kufwa, kasi ya ke vwanda samu na mambote, na yawu Nge katuka na yinzo. Kwenda ntama, samu ba ke lomba na Nge na kusambilu samu na yandi, to, kubelusa yandi, mpe—mpe Mu zola ve ti Nge sala Yawu." Kana beno tala mbote-mbote disolo yango mutindu beto ke na kukwenda na ntwala, beno ke mona ti yawu ke na kufwanana malembe-malembe na kieleka ya diambu yango. Na yawu, Yesu, kukondwa bukebi to konso kima yina, ya kwendaka ntama ya yinzo mpe ya kwendaka kisika yankaka, ya vutukaka ve na nkokila yina. Mpe Yandi kwendaka na bambanza yankaka. Mpe kaka na ntangu Yesu bikaka yinzo, na yawu bampasi bandaka.

<sup>66</sup> Mpe kana Yesu me bika yinzo ya beno, bampasi ke na nzila. Beno bambuka moyo, kana Yandi me bika yinzo ya beno, bampasi ke na nzila. Ntangu beno me kotisa mambu ya yinza mpe nionso yina ke na kusalama na kati ya mabuundu ya beno, mutindu mwa tomabilu ya nene ya Rickenbacker ya ba-cylindre kumi na sambanu, mpe beno bika Yesu na nganda ya yawu, ntangu Yesu me basika na dibuundu ya beno, bampasi ke na nzila. Yinga, tata, ntangu Yesu me bika denomination mosi, ti bawu tula Yandi na lweka mpe bawu tuba, "Mbote, ntangu yayi beto ke kwikila ve ti bima yayi lendaka vwanda ya kieleka mpenza," mpe beno me ndima kima yankaka, bampasi ke na nzila. Beno bambuka yawu kaka.

<sup>67</sup> Ya ke bambuka munu disolo ya Mfumu Yesu, yina ke na kati ya Buku ya Luc. Beno zaba ntangu Yandi vwandaka mwana ya fioti pene ya bamvula kumi na zole, bantu ya dibuta ya Yandi nataka Yandi, mutindu ya vwandaka mumesanu na konso mvula, na nkinzi ya Pentecote. Mpe ntangu bawu vwandaka na nkinzi na mbanza ya Jerusalem mpe bawu vwandaka lutisa ntangu ya mbote, beto ke mona na kati ya Biblia, ti bawu

tambulaka bilumbu tatu kukondwa Yandi. Mpe mbala yankaka bawu banzaka ti, na mutindu nionso, ti Yesu lendaka vwandaka na kati ya bankalani ya bawu. Ntangu yayi, beto lenda sala mutindu yina ve. Ntangu bawu kwendaka yufula bankalani ya yandi, Yandi vwandaka kuna ve.

<sup>68</sup> Mpe beto lenda tuba ve ti na mutindu nionso, samu beto ke ba-Methodiste, Baptiste, Presbyterien, Pentecotiste, mpe binkulu ya beto mpe batata ya beto vwandaka bakwikidi ya nene, beto mona ti, mbote, ya ke vwanda kaka mutindu yina, Yesu kele na beto. Beto lenda sala mutindu yina ve. Beto fwana vwanda na ngwisani na Yandi konso kilumbu mpe na konso muniti. Oh, mu ke zolaka mutindu yina.

<sup>69</sup> Mu zola yina Nzambi kele na ntangu yayi. Yina bibuti ya munu vwandaka na yawu, yina batata ya munu vwandaka na yawu, yawu ke mbote mingi, kasi (Yina ba vwandaka na yawu kele mbote.) mu banza ti beto kele ntama na nzila.

<sup>70</sup> Beto tala yina Yandi kele bubu yayi. Mu zola ve kutala na manima samu na kumona yina Tata Moody salaka, samu beto me kuma ntama na nzila kulutila Tata Moody. Mpasi ya mabuundu ya beto kele: kutala na manima mpe kutuba, “Mbote, beto tala yina Tata John Wesley tubaka, yina bayankaka tubaka.” Yawu yina bantu ya mayele me kuma ntama na mambu ya bawu, kulutila nsambulu na mambu ya yawu.

<sup>71</sup> Bamvula nkama tatu me luta awa, muntu mosi ya mayele ya France siamisaka ti kana beno kwenda mbangu mingi na ba-kilometre makumi tanu na ngunga mosi, beno ke lemuka na zulu mingi na ntoto. Beno banza ti bantu ya mayele ke fwanikisa yawu na bubu yayi? Bawu ke na kukwenda na ba-kilometre mafunda tatu na ngunga mosi mpe ba ke landila kaka na kukwenda. Ba ke na kukwenda na ntwala, ba ke na kutala na ntwala. Kasi beto ke zola kutala na manima samu na kumona yina Moody tubaka; yina Sankey tubaka; yina Finney tubaka; Knox, Calvin; bayina yankaka. Yina bawu tubaka vwandaka mbote mingi. Yina vwandaka samu na nsungi ya bawu, kasi beto ke na kukwenda na ntwala.

<sup>72</sup> Nkooko ya munu ya bakala vwandaka twadisa charette ya bangombe. Mu ke na kutwadisa Ford V8. Mwana ya munu ya bakala ke twadisa pepo ya mbangu mingi. Samu, beto ke na kukwenda na ntwala. Yawu yina nsambulu lendaka vwanda. Kwizulu ya Mfumu me kuma pene-pene. Dibuundu fwana kwenda na ntwala samu na kukota na bangolo ya yawu. Bantu ya mayele lenda mata kaka tii na kisika mosi mpe ba ke kulumuka, kasi beto ke na bayinto yina ba me sadilaka ntete ve, yina ba me simbaka ata fioti ve, ya ngolo, yina ke na nsuka ve, ya Nzambi, sika wapi beto fwana kota. Beto ke na kuzinga na ba-million ya ba-kilometre na nsi ya muswa ya beto na nkokila yayi, bamuswa ya Baklisto lendaka vwanda na yawu. Mu ke vwandaka na nsoni

ya munu mosi ntangu mu ke talaka awa mpe ke monaka bayinzo ya maboma, mpe bimbevo, mpe bampasi yina ke na kusalama na ntangu yayi. Dibuundu ya beto lendaka tambula na bala-bala, samu na kubelusa bambevo, kuvumbula bamvumbi, kubasisa bampeve ya yimbi, kusala bidimbu mpe bimangu, kusala ti yinza ya muvimba kubakula ti Yesu Klisto ke na kuzinga. Yawu yina beto fwana sala.

<sup>73</sup> Mpamba ve, beno ke tuba, “Ata fioti ve Tata Moody...” Tata Moody vwandaka zinga na nsungi yayi ve. Ya kieleka. Beto ke na kuzinga na Kwizulu ya Mfumu. Mpe beto me mona ti Yandi vwandaka na bankalani ya beto na mutindu nionso. Kasi kilumbu yina ntangu muntu mosi tulaka ntembe na Tata Graham, beto me mona ti Yandi vwandaka ve na kati ya bankalani ya beto.

<sup>74</sup> Wapi bawu monaka Yandi? Wapi—wapi bawu monaka Yesu? Kaka kisika bawu bikaka Yandi. Wapi bawu bikaka Yandi? Na nkinzi ya Pentecote. Wapi beto me bika Yesu, wapi dibuundu salaka yawu? Na nkinzi ya Pentecote. Ntangu beto me kwenda ntama ya ngolo ya Pentecote ya ntama mpe nkinzi ya Pentecote, beto ke kwenda ntama na Yesu. Yina ke ya kieleka, nkundi ya munu. Beto ke na kuzinga na nsi ya bamuswa ya beto. Yinga, tata.

<sup>75</sup> Bawu bikaka Yandi na nkinzi ya Pentecote, mpe ya ke na kisika mosi kaka yina ba-Methodiste, ba-Baptiste, ba-Presbyterien, na ba-Pentecotiste ke mona Yandi, ya ke kuvutuka kisika beno bikaka Yandi. Wapi kiese ya Mfumu? Wapi ngolo ya Mfumu? Dibuundu ke yufula bubu yayi, “Yinki—yinki me kumina Nzambi ya masolo?” Yandi ke na kuvingila ti bantu ya Yandi na kisalu. Kasi...

<sup>76</sup> Beto lenda sala yawu ve na nzila ya ba-denomination. Beto lenda sala yawu ve na psychologie. Beto lenda sala yawu ve na arithmetique, to beto lenda sala yawu ve na mayele ya lukolo. Beto na beto ke kabwana, beto ke kukikabula beto mosi. Beto ke ya kukabwana ve. Beto kele muntu mosi kati na Klisto Yesu. Beto nionso kele mosi kati na Klisto, mpe ba-denomination ya beto ke sala yawu ata fioti ve. Ata ti yawu kele mbote, yawu ke sala yawu ve. Mayele ya beto ya lukolo kele disakuba ya kulutila nene yina Nsangu ya mbote me kuzwaka ntete ve, mayele ya lukolo.

<sup>77</sup> Beto ke na nsatu ya mayele ya lukolo ve. Beto ke na nsatu ya kuvutuka ya ngolo mpe kutalisama ya Mpeve-Santu na kati ya dibuundu samu na kutalisa ngolo. Yesu tubaka ata fioti ve ti, “Beno kwenda na yinza ya muvimba mpe—mpe beno longusa.” Yandi tubaka ata fioti ve ti, “Beno kwenda na yinza ya muvimba mpe beno sala...” Yandi tubaka, “Beno kwenda na yinza ya muvimba mpe beno longa Nsangu ya mbote.” Mpe Nsangu ya mbote kele kutalisa ngolo ya Mpeve-Santu, mvumbukulu. Beto ke kaka na million ya ba-kilometre na kisika beto lendaka

vwanda. Beto kwenda na ntwala. Beto vutuka kisika beto bikaka Yandi na nkinzi ya Pentecote.

<sup>78</sup> Yesu tubaka, na Jean, mu banza, kapu 15, Yandi tubaka, “Mu kele Vinu; beno kele mavala.” Mbote ntangu yayi, kana Vinu yina kubasisaka divala ya ntete, mpe divala yango sonikaka Buku ya ba-Acte, divala ya zole ke sala Buku yankaka ya ba-Acte. Divala ya tatu ke sala Buku yankaka ya ba-Acte. Mpe konso divala yina me basika na Vinu yina ke vwanda mutindu mosi divala ya ntete vwandaka.

<sup>79</sup> Ntangu yayi, beno lenda bamba yawu, beto zaba yawu. Mu me monaka yinti ya citron na bambuma ya luswaswanu pene ya nana. Mu me monaka yinti ya malala ke basisa bambuma ya pamplemousse, ba-citron, mpe bima yankaka nionso na zulu ya yawu, kasi ba bambaka yawu.

<sup>80</sup> Yawu yina ke diambu bubu yayi. Beto me bamba mabanza ya beto, beto me bamba ba-denomination ya beto, kasi kana yinti yina me basisa mbuma yankaka ya vinu, yawu mosi, ya ke vwanda mutindu mosi na bambuma yina ya kisina bawu kunaka. Alleluia! Oh, dibuundu ke vukana, kasi beto ke na nsatu ya ngolo ya kisina. Beto ke na nsatu ya Mpeve-Santu, ngolo ya mvumbukulu ya Yesu Klisto. Yawu yina Yandi tubaka na beto na kusala.

<sup>81</sup> “Mu kele Vinu, beno kele mavala.” Kana yinti ya vinu kubasisa divala, mpe yawu buta bambuma ya vinu ya bleu ya kitoko, vinu yina ke landa ke vwanda na bambuma ya vinu ya bleu ya kitoko. Kana Vinu ya ntete kubasika, mpe bawu simbamaka na ngolo ya Mpeve-Santu, mpe bawu salaka bimangu ya nene, mpe bidimbu, mpe bawu niemaka kimbangi ya bawu na yinza... Ata mpe mingi ya bawu na kimbangi ya bawu mosi, bawu, na menga ya bawu, bawu niemaka kimbangi ya bawu. Bawu lutaka na bigonsa ya mutindu na mutindu mpe nionso yina samu na kulonga Nsangu ya mbote. Bawu monaka mpasi; ba bulaka bawu; ba pesaka bawu ndola. “Beto fwana kwenda na Zulu, na mbeto ya bafelele ya kukondwa mpasi, na ntangu bayankaka nwanaka samu na kubaka lufutu, mpe bawu zabukaka na kati ya banzadi ya menga?” Yinki lendaka sala? “Mu fwana nwana kana mu fwana yala. Matisa kikesa ya munu, Mfumu.” Ya kieleka. Beto ke na nsatu...

<sup>82</sup> Beto ke na nsatu ya denomination ya malu-malu ve. Beto ke na nsatu ya lutungu ya yinzo-Nzambi ya malu-malu ve. Yina beto ke na yawu nsatu bubu yayi kele kuvutuka na reveil ya Pentecote ya ntama, yina me zibulaka nzila ya zulu, yina ke fwaka masumu, yina bandaka na Pentecote mpe yawu me vutuka diaka na dibuundu, ngolo ya Mpeve-Santu diaka, samu na kukotisa Yesu na kisalu.

<sup>83</sup> Nzambi ya masolo ke kotaka ntangu nionso na kisalu na ntangu ya mpasi. Beto ke na yawu nsatu. Yawu yina diambu

ya mabuundu ya beto bubu yayi. Beto ke na kuvutuka mingi na manima. Beto ke na kubwa na kati ya bamvwatu ya yinza. Mpe malembe-malembe, mvula na mvula, yawu me banda na kufwa mpe kuzimbana.

<sup>84</sup> Ntangu ya kuzenga mavala ya yinti me kuma pene-pene. Na ntembe ve Nzambi ke zenga yawu mutindu mu me telema na chaire yayi. Nzambi ke zenga yawu samu yawu buta mbuma. Mosi ya bilumbu yayi Yandi ke zenga bisalu ya yinza. Yinki nsoni yayi, mutindu dibuundu ke na kusala mambu na nkumbu ya nsambulu.

<sup>85</sup> Mpe me mona ti, ntangu Yesu kwendaka, lufwa kotaka. Ntangu Yesu me bika dibuundu ya beto, ngolo ya Mpeve-Santu me bika dibuundu ya beto, yawu ke banda na kufiotuka mpe—mpe ya ke fwa. Mpe na manima ya mwa ntangu fioti ya ke vwanda diaka na kima mosi ve. Ntangu yayi, ntangu Yesu kwendaka, lufwa kotaka. Oh, yinki ntangu ya mawa yawu vwandaka.

<sup>86</sup> Mpe beno tala, bawu kukiyufulaka bakiuvu, mpe bawu kwendaka bokila Yesu, kasi Yandi kwisaka ve. Bawu kwendaka bokila Yandi diaka, mpe Yandi kwisaka ve, kasi Yandi zabaka yina Yandi ke sala. Yandi zaba na nkokila yayi, yina Yandi ke sala. Mambu ke ya kubeba ve na Yandi: Yandi zaba mpenza yina Yandi zola sala. Yandi ke basisa nkonga mosi ya bantu, ya kieleka kaka mutindu mu me telema na chaire yayi. Yandi ke basisa nkonga mosi ya bantu samu na Nkumbu ya Yandi na kati ya nsungi ya Bantu ya makanda. Yandi ke sala yawu.

<sup>87</sup> Ntangu ya ba-Juif me kuma pene-pene ntangu yayi, mpe ntangu ya Bantu ya makanda me kuma na nsuka, samu bawu ke landila kaka na kubasika na nzila. Bawu ke na kumanga Klisto; ba ke na kumanga bidimbu ya bawu; ba ke na kumanga bima nionso yina ba me bokila busantu, mpe ba ke na kubokila yawu mwa télépathie to ngolo ya diabulu mpe ke sala... Ba ke na kufinga Mpeve-Santu mpe ba mekabwana bawu mosi na Nzambi. Mpe Nzambi ke baka bantu yina fioti, na manima ya mwa ntangu fioti, mpe ke kumisa yawu Dibuundu ya ngolo, na manima ya ke tinda Mpeve na ba-Juif, mpe ke nata Dibuundu ya Bantu ya makanda na yinzo. Ya kieleka mpenza. Ya ke na kukubama ntangu yayi. Mbote, beto me kuma na ntangu ya nsuka, na mutindu yayi.

<sup>88</sup> Yesu, Yandi zabaka. Mpe na manima ya mwa ntangu fioti Yandi tubaka, “Nkundi ya beto Lazare me lala.”

<sup>89</sup> Mpamba ve, bilandi banzaka ti yandi vwandaka pema fioti. Yandi tubaka, “Mbote, kana yandi me lala, yandi kele mbote mingi.”

<sup>90</sup> Mbote, Yandi tubaka na Yandi...na nzonzolo ya bawu, na mutindu ti bawu bakula, ya tubaka, “Yandi me kufwa, mpe samu na beno Mu ke na kiese samu Mu vwandaka kuna ve.” Beno

me mona? "Samu na beno mu ke na kiese samu Mu vwandaka kuna ve." Samu ba lendaka tuba na Yandi na ku—kubelusa—kubelusa yandi, kasi yandi zabaka ti Yandi lendaka sala yawu ve, samu vision vwandaka diaka . . . na manima ya bilumbu yiya yina Yandi zabaka ti yina vwandaka ntangu Tata tubaka na Yandi. Ya ke kitoko mingi; Yandi tubaka na ntoni, "Tata, Mu ke tonda Nge, Nge me kuwa yawu dezia, kasi Mu ke tuba yawu kaka samu na bayayi kele awa." Beno me mona? Yandi zabaka dezia yina Yandi ke sala. Yandi tubaka, "Mu ke kwenda telemisa yandi na mpongi."

<sup>91</sup> Ntangu yayi, mu lenda banza ti mwa dibuta yina vwandaka na kiadi mpenza. Dikunzi ya yinzo me kwenda, mawa. Oh, ya ke kitoko mingi ntangu beno ke na dibuta ya mawa to ntima ya mawa, na manima Yesu ke monana na mbala mosi, mutindu yina ve? Mu lenda banza na kumona Marthe, mwa kento mosi ya kitoko na voile ya ndombe na kizizi ya yandi, mpe Marie yayi ya fioti, mpe bawu simbanaka mosi na yankaka, na kutubaka, "Yinki beto ke sala? Papa na Mama kele diaka ve, mpe mpangi ya bakala ya ntalu . . . Ntangu yayi, beto bika dibuundi, mpe ba me basisa beto na yawu, mpe beto me basika samu na kulanda Yesu ya Nazareth. Mpe Yandi me kwenda ntama mpe me bika beto, kisika mosi kuna."

<sup>92</sup> Mu lenda kuwa muntu ya masawula kukwisa pene-pene mpe kutuba, "Hé, wapi Munganga ya Kinzambi, Profete yina ya Galilée? Yandi kele wapi ntangu yayi? Beno me mona, ntangu yawu yayi samu na Yandi na kusala kima mosi, Yandi me kwenda." Yawu yina. Beno me mona, Nzambi ke zolaka kusala mutindu yina, kubika bantu, kaka, kubika bantu kutalisa yina bawu kele, yinga, kumeka bawu kaka samu na kutala yina bawu kele mpenza. Yandi ke pesaka bawu lusakumunu. Yandi ke monanaka, Yandi ke kukitalisaka, Yandi ke kukitendulaka na bantu, samu na kumona yinki mutindu bawu ke sala, samu na kumona yinki bawu ke sala samu na yawu.

<sup>93</sup> Ntangu yayi, beto ke mona ti, na manima ya mwa bilumbu fioti, bilumbu yiya, Lazare kufwaka. Bawu zikaka yandi. Kilumbu ya zole, kilumbu ya tatu, kilumbu ya yiya . . . Ntangu yayi, muntu nionso kuzaba ti kupola ke bandaka na manima bilumbu tatu: mbombo niefwamaka na zulu ya kizizi, ntete. Na manima kupola bandaka; bankusu ya mpusu bandaka na kudia nzutu. Ba kotisaka yandi na ntoto, bawu tulaka ditadi ya nene na zulu ya dibulu yina bawu tulaka yandi. Mpe na mbala na mbala, bana-bakento ya bantwenia vwandaka kwenda kuna mpe kufukama na ntoni mpe kudila.

<sup>94</sup> Mpe na manima ya mwa ntangu fioti, nsangu wakanaka ti, "Yesu me kwisa. Beto me mona Yandi ke tambula na kati ya mbanza." Oh, Marthe yina ya fioti, yina vwandaka mutindu yina, na kutala na meso, na kulemba mingi samu na diambu yango, yandi talisaka yina vwandaka na kati ya yandi. Yandi

yina ke na kukwisa. Yandi basikaka na nzila, ya kwendaka sosa yandi. Mu lendaka kuwa bantu yankaka na nzila kutuba, "Mbote, mu banza ti beno me sepela ntangu yayi, ti nsambulu ya nge vwandaka ya luvunu." Yandi landaka bawu ve mpe yandi kwendaka na ntwala, yandi lutaka kaka na lweka ya bantu nionso ya masawula. Yandi kwendaka kuna tii kuna yandi monaka Yandi, mbala yankaka ya vwandaka na nsongi ya bala-bala.

<sup>95</sup> Ntangu yayi, na kutala na meso, yandi fwana...yandi lendaka vwandaka na muswa ya kunganina Yandi mpe—mpe kutuba na Yandi na mutindu ya yimbi. Mpamba ve, yandi kwendaka mbangu ve, "Tala awa, tala awa, Nge. Nge lendaka vwandaka Profete, Muntu ya Nzambi. Samu na yinki Nge kwisaka ve ntangu beto bokilaka Nge? Mpamba ve, ntangu yayi beto me kuma kima ya kuseka ya mbanza. Beto me basika na mabuundi ya beto samu na kulanda Nge." Yawu monanaka ti yandi vwandaka na muswa. Kasi beno zaba, kaka mutindu mu longaka samu na, *Mwana-dimeme Na Yembe*, kana beto kele mwana-dimeme, mwana-dimeme ke pesaka bamuswa nionso ya ke vwandaka na yawu. Ya kieleka mpenza. Yandi ke vwandaka na kima yankaka ve kasi mika, na yawu yandi ke pesa yawu kaka. Mpe beno ke pesa bamuswa nionso beno ke na yawu samu na kusadila Nzambi. Ya kieleka mpenza.

<sup>96</sup> Mu vwandaka zonzila bakento samu na mutindu ya bawu vwandaka lwata mwa bilele yayi ya fioti, beno zaba, mpe bawu tubaka, "Mbote, beto kele—beto kele ba-American. Beto lenda sala yina beto me zola."

<sup>97</sup> Mu tubaka, "Ya kieleka mpenza, kasi kana beno kele mwana-dimeme, beno ke pesa bamuswa ya beno." Kunwa makya mpe kusala mambu ya mutindu yina, yina ke kima ya kulutila yimbi kento lenda sala ve. Ya kieleka mpenza.

<sup>98</sup> Mama mosi tubaka na munu, ntama mingi ve, yandi vwandaka tubaka na munu, yandi tubaka, "Kasi, Mpangi Branham, ba ke salaka bilele ya mutindu yankaka ve."

<sup>99</sup> Mu tubaka, "Kasi ba ke na kusala kaka bamasini ya bilele mpe ba ke tekissa ba-tissu. Pardo kele ve samu na yawu na mutindu nionso." Ya kieleka mpenza.

<sup>100</sup> Beno bambuka moyo, kilumbu mosi, nge lenda vwandaka ya kukondwa mvindu awa samu na bakala ya nge, kasi samu na yawu nge ke pesa mvutu samu na pité, ya kieleka mpenza: "Yina me tala kento samu na kulula yandi, yandi me sala na yandi dezia pité na kati ya ntima ya yandi."

<sup>101</sup> Yinki diambu na bakento ya ba-Pentecotiste bubu yayi, yawu yina kiuvu mu ke kukiuyufula. Mutindu beno me kwenda ntama ya ndiatulu ya ntama. Mutindu bamama ya beno vwandaka na bansuki ya yinda, kasi bubu yayi bakento ya ba-Pentecotiste ya kupakula-pakula mutindu nkonga ya Mardi

Gras, mpe bawu ke zenga bansuki ya bawu, mpe bawu ke lwata mwa bilele ya nkufi mutindu yina, mutindu bayankaka ke salaka . . . bawu ke basika na nganda samu na kuzenga matiti na manima ya midi, na ntangu babakala ke na kuluta kuna, beno me bakula, bakento, ti beno ke pesa mvutu samu beno me sala pité na babakala yina? Beno mosi me kukitalisa na ntwala ya bawu samu na kikuma yina. Yina ke mpeve ya yimbi na zulu ya dibuundu mpe bantu, mpe bawu me zaba yawu ve. Mpofo mpe bawu zaba yawu ve. Ya kieleka.

<sup>102</sup> Mu banza ti beno lenda tuba ti mu ke na muswa ve ya kutuba mutindu yina mutindu evangeliste. Mbote, mu—mu fwana landa kaka lutwadusu ya Mpeve-Santu; yawu yina kaka mu lenda tuba. Beno . . . Kana mu kutana na beno na lusambusu, na yawu mu fwana vwanda ve na menga ya beno na maboko ya munu. Beno kwenda ntama ya mambu nionso yina ke monana ya Satana. Beno vwanda ntama na yawu. Beno katuka kuna. Ya me tala munu ve ba-vedette ya cinema yikwa . . . Nge kele ve, awa, samu na kuvwanda vedette ya cinema; nge ke mwana-kento ya Nzambi.

<sup>103</sup> Mu longaka na dibuundu ya pasteur mosi na suka yina, samu na mpika mosi ya ntama, ya me luta ntangu ya yinda na ntangu ba vwandaka teka bampika. Mpe bawu vwandaka kwisa kuna mpe kusumba bawu na muntu yina vwandaka pesa mbongo mingi. Mpe bantu vwandaka kuna, bawu vwandaka kudila, kuboka, samu na bwala ya bawu; ba ke vutuka kuna ata fioti diaka ve. Mpe ba vwandaka bula bawu fimbu. Ba vwandaka sumba bawu kaka mutindu beno ke sumbaka tomabilu, na konso kima yina, ba vwandaka tula ntalu, mpe bawu vwandaka teka bantu yango.

<sup>104</sup> Mpe kilumbu mosi, musumbi mosi kwisaka kuna, musumbi ya bampika, na fonda- . . . na kilanga mosi ya nene, mu zola tuba. Mpe yandi tubaka, “Beno ke na bampika yikwa ya kuteka?”

<sup>105</sup> Yandi tubaka, “Mbote, mu ke bayina kusobikisa.” Bawu vwandaka meka na kukumisa bawu nene. Ba vwandaka baka bamama yayi, batata . . . Kana kento yina yandi kwelaka vwandaka kento ya mwa nzutu ya fioti, ba vwandaka baka babakala yayi ya nene ya mavimpi ya mbote samu na kuvukisa bawu na . . . mutindu bampunda na baniamma. Ya vwandaka mbote ata fioti ve. Nzambi me sala muntu. Muntu me sala bampika. Na kubanda ya ke mbote ve, ata fioti ve. Nzambi ke zolaka ve ti muntu kuvwanda mpika. Ve, tata. Mpe mosi ve . . . Beno tala yina salamaka.

<sup>106</sup> Na yawu na kati ya nionso yina, muntu yango kutubaka, “Mbote, mu ke zola sumba bayankaka ya bawu . . .” Yandi monaka mwana-bakala mosi ya ntwenia kuna. Ba vwandaka bula yandi fimbu ve. Kindefo ya yandi vwandaka ya kutelemisa, yintu ya kutelemisa, yandi vwandaka tambula bisika nionso.

Mpe musumbi yina ya bampika tubaka, “Mu zola kusumba yandi.”

<sup>107</sup> Yandi tubaka, “Kasi yandi ke ya kuteka ve.”

<sup>108</sup> Yandi tubaka, “Mbote, samu na yinki?” yandi tubaka, “Yandi ke mfumu?”

<sup>109</sup> Yandi tubaka, “Ve, yandi kele mpika.”

<sup>110</sup> “Mbote,” yandi tubaka, “samu na yinki? Nge ke disaka yandi mbote mingi kulutila bayankaka?”

<sup>111</sup> Yandi tubaka, “Ve. Yandi ke diaka kuna na kantini na bayankaka. Yandi kele mpika.”

<sup>112</sup> Yandi tubaka, “Yinki ke sala ti yandi kuvwanda ya kuswaswana na bayankaka?”

<sup>113</sup> Mpe mfumu tubaka, “Munu mosi mpe kukiyufulaka kiuvu yango ntangu ya yinda, kasi kilumbu mosi munu kuzwaka yawu. Kuna na bwala ya yandi, tata ya yandi kele ntinu ya dikanda. Mpe ata ti yandi kele nzenza ntama ya bwala ya yandi, yandi zaba kaka ti yandi kele mwana ya ntinu mpe yandi ke kukitambwisa mutindu yina.” Kana yina... Kana mwana-bwala ya Afrique lendaka bakula ti tata ya yandi kele ntinu, mpe awa nzenza ntama na ntoto ya nzenza yandi lendaka zaba kaka ti kuna na simu ya nzadi yandi kele mwana ya ntinu, yinki mutindu bakento na babakala lendaka kukitambwisa ntangu beno kele bana-babakala mpe bana-bakento ya Nzambi? Beno sala mutindu yina. Ya kieleka mpenza. Beno kukitambwisa mbote; beno sukula baluzingu ya beno mpe beno zinga mutindu bana-babakala mpe bana-bakento ya Nzambi. Beno yituka ve, beno tala mutindu yango.

<sup>114</sup> Beto me kuma kisika yango. Oh, Marthe ya fioti, yandi basikaka mbangu. Ya monanaka ti yandi vwandaka na kima mosi samu na kutelemisa Yandi. “Samu na yinki Nge kwisaka tala ve mpangi ya munu ya bakala? Tala yina beto me sala samu na Nge, kasi Nge me losa beto.” Mbote, kana yandi fwanaka tuba mutindu yina, disolo lendaka suka mutindu yina ata fioti ve. Ve, tata. Ya ke mutindu beno ke pusana na ntwala ya dikabu ya Kinzambi ya Nzambi. Kana Nzambi me tinda dikabu mosi, beno fwana pusana na ntwala ya yawu na mutindu ya mbote. Kana beno ke vingila na kuzwa kima mosi na yawu, beno fwana pusana na yawu na mutindu ya mbote. Mpe Marthe zabaka yawu. Mbala yankaka yandi tangaka disolo ya kento ya Sunamite na bébé ya yandi. Mpe yandi... Kana kento yina ya Sunamite zabaka ti Nzambi vwandaka na kati ya Elie, mbala yikwa mingi diaka Yandi vwandaka na kati ya Yesu? Ya kieleka.

<sup>115</sup> Na yawu, yandi kwendaka kuna na mutindu ya mbote. Yandi kwendaka mbangu mpe yandi bwaka na makulu ya Yandi. Mu ke zolaka mutindu yina! Yandi bwaka na makulu ya Yandi mpe yandi tubaka, “Mfumu...” Yawu yina mutindu ya mbote ya

kubokila Yandi. Yawu yina Yandi vwandaka. Yandi vwandaka Mfumu ya yandi. “Mfumu, kana Nge vwandaka awa, mpangi ya munu ya bakala lendaka kufwa ve.”

<sup>116</sup> Oh, la la! Oh, mu lendaka banza na kumona ntima ya Yandi ya nene mutindu Yandi talaka kento yina ya kitoko, masa ya meso vwandaka kulumuka na matama ya yandi. Yandi tubaka, “Mfumu, kana Nge vwandaka awa, mpangi ya munu ya bakala lendaka kufwa ve.” Beno tala yina yandi tubaka. “Kasi ata mpe na ntangu yayi, Mfumu, ata ti yandi me fwa, ata ti bankusu ya mpusu ke na kutambula na nzutu ya yandi, ata mpe na ntangu yayi, Mfumu, nionso yina Nge ke lomba na Nzambi, Nzambi ke pesa yawu na Nge.”

<sup>117</sup> Oh, yawu yina kinsweki. Beno lendaka tuba, “Mu me tambula na balupitalu nionso. Dokotolo me tuba ti mu ke fwa, kasi ata mpe na ntangu yayi, Mfumu... Mu me kuma kikata na arthrite; mu lenda tambula ve, kasi ata mpe na ntangu yayi, Mfumu...”

<sup>118</sup> Bébé yina ya fioti vwandaka na kimbevo ya massa na yintu yina kumaka nene mutindu *yayi* mazono na nkokila. Ya ke na kima mosi ve beno lenda sala. Yandi zolaka landila kaka na kukuma nene mpe kupanza mwa yintu ya yandi mpe yandi kufwa, “Kasi ata mpe na ntangu yayi, Mfumu...” Yandi ke kaka Nzambi yina mosi. Yandi ke kaka Mfumu yina mosi. “Ata na ntangu yayi, Mfumu...” Mpe Yandi me vwanda na diboko ya kibakala ya Nzambi ya Ngolo nionso, ke na kulombila beto bima yina yina beto ke ndimaka ti Yandi salaka samu na beto.

<sup>119</sup> Ntangu yayi, mu me kukiwa mpenza musambidi. Ya kieleka mpenza. Beno ke bokila munu exalté na mutindu nionso, na yawu beno lendaka sala mbote na kubanda, mpe beno sukisa na yawu.

<sup>120</sup> Na yawu, yinga, tata, “Ata mpe na ntangu yayi, Mfumu, nionso yina Nge ke lomba na Nzambi, Nzambi ke sala yawu.”

<sup>121</sup> “Beno lomba konso kima yina na Tata na Nkumbu ya Munu, Mu ke sala yawu,” Yesu tubaka.

<sup>122</sup> “Ata mpe na ntangu yayi, Mfumu, nionso yina Nge ke lomba, Nzambi ke pesa yawu na Nge.” Oh, diambu yango kotaka na kati ya ntima ya Yandi ya nene.

<sup>123</sup> Yandi tubaka, “Mpangi ya nge ke zinga diaka.”

<sup>124</sup> Yandi tubaka, “Yinga, Mfumu. Yandi ke zinga. Yandi vwandaka mwana-bakala ya mbote. Yandi ke vumbuka na lufwa na mvumbukulu ya bantu nionso na kilumbu ya nsuka.” Ba-Juif yango vwandaka kwikila na mvumbukulu ya bantu nionso. “Yandi ke vumbuka na lufwa na mvumbukulu ya bilumbu ya nsuka.”

<sup>125</sup> Beno tala Yandi. Yandi ningisaka nzutu ya Yandi ya fioti. Yandi tubaka, “Mu ke Mvumbukulu mpe Luzingu.” Oh, la la. Ata

muntu mosi ve me tubaka ntete mutindu yina. Ya ke vwanda ata na muntu mosi ve na manima, lenda tuba yawu. Yandi kele kaka Mosi yina lenda tuba yawu. "Mu ke Mvumbukulu mpe Luzingu," Mfumu tubaka. "Yandi yina me kwikila na Munu, ata ti yandi me fwa, yandi ke zinga diaka. Mpe muntu yina ke zinga mpe yina me kwikila na Munu yandi ke fwa ata fioti ve. Nge me kwikila yawu?"

<sup>126</sup> Yandi tubaka, "Yinga, Mfumu." Oh, yandi zabaka ti kima mosi ke zola kusalama. Ya fwana salama kaka.

<sup>127</sup> Ntangu lukwikilu me katuka na ntima ya kieleka yawu me kutana na Nzambi, menu ya kisadilu ke vukana kisika mosi mutindu *yayi*. Kima mosi fwana salama kaka. Mu me tula ntembe na bantu yayi nionso na nkokila yayi, na Nkumbu ya Yesu Klisto, beno bika lukwikilu ya beno kuvukana na Nzambi mutindu yayi, na mwa minuti fioti beto ke vwanda na Pentecote yankaka. Ya ke vwanda na reveal mosi ya nene na kati ya mbanza yayi, ti ya ke vwanda ve na bapulusu mingi na mbanza yayi samu na kuvwandisa bawu. Ya kieleka. Ya ke vwanda na reveal ya kieleka. "Ata mpe na ntangu yayi, Mfumu . . ."

<sup>128</sup> "Mbote, Mfumu, beto me kangama na diambu *yayi*; beto salaka *yayi*, mpe beto salaka *yina*." Mu ke kipe ve yina beno salaka, "Ata mpe na ntangu yayi, Mfumu . . ." Yandi ke na kuvingila ti beno bokila Yandi. Yandi . . . "Nge me kwikila yawu?" Ya kieleka. Yinga, tata. "Ata mpe na ntangu yayi, nionso yina Nge ke lomba Yandi . . ."

<sup>129</sup> "Wapi beno me tula yandi?" Ntangu yayi, Yandi kulumukaka na ntoni. Yandi vwandaka mpenza muntu samu na kudila; Yandi vwandaka mpenza Nzambi samu na kuvumbula bamvumbi.

<sup>130</sup> Awa ntama mingi ve, kento mosi ya kimvuka ya bantu mosi . . . Mu ke salaka yawu mumesanu ata fioti ve kusala yawu samu na ba-denomination. Kasi kento yayi . . . Bawu ke kwikilaka ve ti Yesu vwandaka Nzambi. Ba ke tubaka ti Yandi vwandaka kaka profete. Ntangu yayi, Yandi vwandaka . . . Kana Yandi vwandaka kaka profete, beto nionso kele na masumu. To Yandi vwandaka Nzambi, kima yankaka ve na nsi ya Nzambi, to muntu ya luvunu ya kulutila nene yina yinza me kuzwaka ntete ve. Ya kieleka. Yandi vwandaka ya kulutila muntu. Yandi tubaka, "Yandi vwandaka Nzambi ve."

<sup>131</sup> Ya ke na mambu mingi ya mutindu yina na kati ya nsangu ya mbote yayi ya bantu bubu yayi; kumeka kusala Yesu Klisto profete. Mpamba ve, Yandi vwandaka Nzambi ya baprofete. Yandi vwandaka mpenza mutindu yina.

<sup>132</sup> Yandi tubaka, "Mu siamisa yawu na nge na nzila ya Biblia ya nge, 'Yandi vwandaka kaka muntu.'"

<sup>133</sup> Mu tubaka, "Sala yawu."

<sup>134</sup> Mpe yandi tubaka, “Ntangu Yandi kwendaka na ntoni ya Lazare, Biblia me tuba, ‘Yandi dilaka.’ Yandi zolaka vwanda muntu yina ke fwaka to Yandi lendaka kudila ve.”

<sup>135</sup> Mu tubaka, “Mama, yawu yina Disonuku ya nge?” Mu zola vwanda ve muntu ya kukondwa luzitu awa samu na kutuba diambu yayi, kasi mu ke tuba na beno yina mu tubaka na yandi.

<sup>136</sup> Yandi tubaka, “Yawu yina.”

<sup>137</sup> Mu tubaka, “Nzonzolo yina ke ya kulemba mingi mutindu supu ya kivudi ya nsusu yina me kufwa na nzala.” Mu tubaka, “Mbote, nge—nge ke ata na kima mosi ve ya kutelema na zulu ya yawu.”

<sup>138</sup> Yandi tubaka, “Mpamba ve, Yandi dilaka. Yina talisaka ti Yandi vwandaka muntu yina ke fwaka.”

<sup>139</sup> Mu tubaka, “Yandi vwandaka muntu yina ke fwaka mpe muntu yina ke fwaka ve. Yandi vwandaka Nzambi na kati ya nzutu.”

<sup>140</sup> Yandi tubaka, “Oh, yina ke buzoba!”

<sup>141</sup> Mu tubaka, “Yandi vwandaka dila ntangu ya kwendaka na ntoni. Yina ke kieleka mpenza, kasi ntangu Yandi sungikaka mwa nzutu ya Yandi ya fioti...” Biblia me tuba, “Yandi vwandaka ve na kima ya kubenda bukebi na zulu ya Yandi; ya vwandaka na kitoko ve samu beto tala Yandi.” Kasi ntangu Yandi vutulaka mwa mapeka yango na manima mpe tubaka, “Lazare, basika,” mpe muntu yina kufwaka kubanda bilumbu yiya mpe yandi polaka na kati ya ntoni, yandi basikaka. Yina vwandaka kulutila muntu. Beno talisa na munu muntu yina lenda yawu. Yinki ya vwandaka? Kupola kuzabaka Mfumu ya yawu. Luzingu zabaka Ngangi ya yawu. Kima mosi fwanaka kusalama. Yandi tubaka mpe muntu yina vwandaka ya kufwa mpe yina vwandaka na kati ya ntoni kubanda bilumbu yiya, yandi vumbukaka diaka, mpe yandi telemaka, mpe yandi zingaka. Alleluia! Yina vwandaka Nzambi na kati ya Mwana ya Yandi. Yinga, tata. Yina vwandaka Nzambi ke kukitalisa Yandi mosi na nzila ya Yandi, Mwana. Yina vwandaka Nzambi ke tuba, muntu ve.

<sup>142</sup> Yandi vwandaka muntu ntangu Yandi talaka kilumbu yina nziunga-nziunga na zulu ya yinti samu na kusosa kima ya kudia. Yina vwandaka muntu. Kasi ntangu Yandi bakaka mwa mampa tanu ya fioti na bambisi zole mpe disaka bantu mafunda tanu, yina vwandaka kulutila muntu. Yina vwandaka Nzambi ke disa bawu kuna. Yandi vwandaka kulutila profete, kulutila muntu, Yandi vwandaka Muntu-Nzambi. Ya kieleka.

<sup>143</sup> Yandi lalaka na manima ya mwa masuwa yina na mpimpa yina, mpe nzadi vwandaka shinga mpe ke tepa-tepa mutindu kifiniku ya mulangi na kati ya nzadi yina ya ngolo, ntangu bampeve ya yimbi mafunda kumi ya nzadi bakaka lukanu ya kuzindisa Yandi na mpimpa yina. Yandi vwandaka

muntu, ya kukondwa kikesa mpe ya kulemba na manima ya kusambilu samu na bambevo, ya lalaka kuna na manima; mpe mupepe vwandaka ata kuyangisa Yandi ve. Yandi vwandaka muntu ntangu Yandi vwandaka ya kulala, kasi ntangu Yandi vumbukaka na mpangi, ya tulaka dikulu ya Yandi na zulu ya dibaya ya masuwa, ya telemisaka meso, mpe tubaka, "Pima, vwanda swi," mpe mipepe mpe balundindi lemvukaka na Yandi, yina vwandaka kulutila muntu. Yina vwandaka Nzambi na kati ya muntu, ke kukitalisa Yandi mosi. Ya kieleka.

<sup>144</sup> Yandi vwandaka muntu na kulunsi ntangu Yandi bokaka samu na kulomba mawa. Ntangu Yandi dilaka mpe tubaka, "Mu ke na nsatu ya masa," yina vwandaka muntu. Ntangu Yandi kufwaka, Yandi vwandaka muntu, kasi na suka ya Pâques ntangu Yandi bukaka bidimbu ya lufwa, difelo, na ntoni, mpe vumbukaka diaka, Yandi vwandaka kulutila muntu: Ya vwandaka Nzambi yina me monisama. Kuyituka ve muyimbi tubaka:

Na luzingu, Yandi zolaka munu; na lufwa,  
Yandi vulusaka munu;  
Na kuzikama, Yandi nataka ntama masumu na  
munu;  
Na mvumbukulu, Yandi me nungisa munu ya  
ofele kukonda nsuka:  
Kilumbo mosi Yandi ke kwisa—Oh, yinki  
kilumbo yayi ya nkembo!

<sup>145</sup> Yandi tubaka, "Samu Mu ke zinga, beno mpe ke zinga. Nge me kwikila yawu?" Yandi ke mutindu mosi mazono, bubu yayi, mpe kukonda nsuka. Nge me kwikila yawu? Mu ke kwikila ti Mpeve-Santu kele awa na ntangu yayi. Nge me kwikila yawu? Mu ke kwikila ti Yandi ke fulusa beto na Mvwandulu ya Yandi. Nge me kwikila yawu? Mu ke kwikila ti Mpeve-Santu ke zola mwangisa Mvwandulu ya Yandi, kubelusa bambevo nionso, kufulusa bantu yina nionso ke na Mpeve-Santu ve. Nge me kwikila yawu? Beno me kwikila na ntima ya beno ya muvimba? Beto telema mpe beto pesa Yandi lukumu. Mu ke kwikila ti Yandi ke kulumuka na zulu ya beto na ntangu yayi.

<sup>146</sup> O Mfumu Nzambi, Ngangi ya zulu na ntoto, Yinto ya Luzingu ya Kukonda nsuka, Mupesi ya dikabu nionso ya mbote, beto "Nge me kwikila yawu," Mfumu. Beto me kwikila ti Nge kele awa na lukutakanu. Beto me kwikila ti Nge ke na kusakumuna miyo ya beto. Beto me kwikila ti Nge ke na kumwangisa Mpeve ya Nge na zulu ya beto. Beto me kwikila ti Nge ke mutindu mosi mazono, bubu yayi, mpe kukonda nsuka. Beto me kwikila ti Nge ke zinga mvula na mvula mpe bankumbu ya beto me sonama na Buku ya Luzingu ya Mwana-dimeme. Mazulu nionso na ntoto ke luta, kasi beto ke zinga kukonda nsuka, samu Nge ke zingaka kukonda. Mfumu, Nge silaka yawu na beto. Beto me kwikila yawu na ntima ya beto ya muvimba. Na yina nionso ke na kati

ya beto, beto me kwikila yawu, Mfumu. Mu ke zolaka Yandi, mu ke zolaka Yandi.

<sup>147</sup> Beno me kwikila na Yandi? Mu me kwikila ti yina ke Mpeve-Santu. Kima mosi ke na kukulumuka na zulu ya beto. Nge me kwikila yawu? Mu ke kwikila ti Yandi zola belusa bantu nionso na ntangu yayi. Nge me kwikila yawu? Beno telemisa maboko na Yandi. Beno telema. Nge me kwikila yawu? Mpeve-Santu kele awa. Yayi kele Yawu! Pierre tubaka, "Yayi kele Yawu." Yawu kele Yawu, Mpeve-Santu.

<sup>148</sup> O Mfumu, Ngangi ya zulu na ntoto, tinda ngolo ya Nge, mpe masakumunu ya Nge, mpe mambote ya Nge na zulu ya bantu yayi, mpe sakumuna bantima ya bawu, mpe bika bawu mona ti Mwana ya muntu ke zinga mvula na mvula. Pesa yawu, O Mfumu. Beto ke pesa bawu na Nge, na Nkumbu ya Yesu Klisto, Mwana ya Nzambi.

<sup>149</sup> Muntu yina nionso ke na Mpeve-Santu ve, beno telemisa maboko ya beno mpe beno kumisa Nzambi. Mu ke kwikila ti Yandi ke kulumuka na zulu ya beno. Muntu mosi kutetika maboko na zulu ya bawu. Ngunga yawu yayi. Samu na yinki beto vingila ntangu ya yinda? Ntangu yawu yayi. Yayi ke ntangu ya Pentecote, ya kuvutuka na Nzambi. Beto vutuka na ngwisani na Nzambi, Pentecote! Bika ti bantima ya beno kubaka kikesa na ngolo ya Nzambi ya moyo. Bika ti Mpeve ya Yandi kwisa kota na kati ya beno, ya fulusa miyo ya beno. Yandi kele awa nkokila na manima ya nkokila, awa samu na kubelusa bambevo, samu na kuzibula meso ya bampofo, na ngolo ya nene mpe ya ngolo yina Yandi ke na kusiamissa Yandi mosi ti ya ke mvula na mvula mutindu mosi. Alleluia!

<sup>150</sup> Beno kumisa Yandi. Beno telemisa maboko ya beno. Beno zimbana kisika beno kele; beno zaba kaka ti beno ke nziunganzaunga ya Yandi, mpe mambote ya Yandi, mpe nkembo ya Yandi, mpe ngolo ya Yandi, mpe mawa ya Yandi ke zingaka kukonda nsuka. Yandi ke ya kukonda nsuka mutindu mosi. Nkumbu ya Mfumu kusakumuka. Alleluia! Oh, beno kumisa Nkumbu ya Yandi ya Santu.

<sup>151</sup> Oh, ya ke mbote, Yandi ke na ngolo. Bantu yikwa zola pesa baluzingu ya beno na Nzambi na ntangu yayi, diaka? Beno telemisa maboko ya beno. Bantu yikwa zola pesa baluzingu ya beno na Nzambi? Yawu yina. Beno telemisa maboko ya beno. Beto mona Pentecote. Beto mona bantu ya Nzambi. Mu ke telemisa diboko ya munu. "Mfumu, munu yayi. Tinda munu." Na yawu baka Wanzio mosi na makala ya autel mpe tinda ngolo ya Nge na zulu ya beto, Mfumu. Nzambi, pesa yawu na muvimba ya Mpeve ya Nge, O Tata. Wa kisambu ya beto, O Mfumu. Wa kisambu ya beto, mutindu bana ya kutelema yina ke na kukwikila. Nkumbu ya Yandi kubaka lukumu.

<sup>152</sup> Oh, mutindu balundindi ya nkembo ke kulumuka, oh, matanga ya malulu ya mawa. O, lukumu na Nzambi. Bika ti mioyo ya beto kuvingila. Nge me kwikila yayi? Nge me kwikila yayi? Ya ke Mpeve-Santu yina ke na kukwisa. Yayi ke ngolo yina ke monanaka ve yina ke twadisa beto na Kimfumu ya Nzambi, masakumunu ya Pentecote. Beno vutuka na yinzo. Ba ke vingila beno na yinzo. Beno ke bantu ya ntalu. Nzambi zola ti beno kukipesa beno mosi. Bakento, beno sukula baluzingu ya beno. Babakala, beno sukula baluzingu ya beno. Beto banda kuvutuka na Nzambi mpe beto sadila Nzambi na ntima ya kieleka mpenza.

<sup>153</sup> Beno kumisa Nzambi, Mpeve-Santu kele kuna na lukutakanu. Beno sala kaka yina beno me twadisama na kusala. Beno bika Mpeve-Santu kubanda kusala na zulu ya beno. Mu lenda tuba kima mosi ve. Mu zaba ve ya kutuba na ntangu yayi. Mpeve-Santu me fuluka na yinzo ya muvimba. Nkumbu ya Mfumu kusakumuka. Mfumu kubaka lukumu. Oh, alleluia! Alleluia! Mfumu kubaka lukumu. Lukumu na Mfumu. Ya ke mbote, ya ke ya nkembo... Ya ke kitoko, ya ke mbote mbote lukumu ya basantu ya Nzambi na zulu ya bizizi ya beno, na nzila ya Mwandulu ya Mpeve-Santu awa yina ke na kutambula mpe ke na katalisa na beto nkembo ya Yandi na kati ya mingi ya bantu yayi ke na ntima mosi, kukumisa Nkumbu ya Yandi.

<sup>154</sup> Beno baluka mpe beno pesa mbote na muntu mosi, beno tuba, "Lukumu na Mfumu, mpangi-bakala. Lukumu na Mfumu, mpangi-kento." Beto kwenda mpe beto bika Nzambi kusala na zulu ya beto. Lukumu na Mfumu. Ya kieleka. Beno nionso ba-Methodiste, ba-baptiste, ba-Presbyterien, ba-Pentecotiste, na ba-Adventiste du Septième Jour, mpe nionso yina beno kele, beno pesana mbote mosi na yankaka na Mwandulu ya Mfumu Nzambi. Yawu yina. Oh, alleluia! Alleluia! Alleluia! Oh, mu ke na kiese mingi samu mu ke mosi ya bawu. Mu na kiese mingi. Oh, bibaka ke na kubukana, mvindu ke na kukatuka. Nkembo! Kimpwanza kati na Mfumu, na kukumisaka Nkumbu ya Yandi ya santu... Nkumbu ya Mfumu kusakumuka. Oh, alleluia! Lukumu na Nzambi.

<sup>155</sup> Oh, mu ke zolaka kumona yawu: bantu ke pesana mbote mosi na yankaka mpe kungengisa bizizi ya bawu. Ngolo ya Nzambi ke tuba, "Yawu yina. Yawu yina, beto ke bana ya Nzambi. Beto nionso kele dibuundi mosi ya nene, muntu mosi ya nene kati na Klisto Yesu, Kento ya Yandi ya makwela, Yina ya nkembo." Kwizulu ya Mfumu me kuma pene-pene. Bantu ya Yandi ke na kuvukana mpe ba ke na kuzolana... na zola mpe ngolo ya Mwandulu ya Yandi. Oh, yayi ke mutindu Zulu. Oh, yayi ke mbote. Amen. Oh, ya ke ya nkembo, ya ke mbote: kusambilila Mfumu kati na Mpeve mpe na ngolo. Ntangu ya mutindu yayi. (Ya vwandaka samu na kusukisa; beto me banda.)

<sup>156</sup> Ya ke na kima ve... Mu tubaka na bampangi, "Bampangi, ya ke na kisika ya kusukisa ve." Ya ke na kisika mosi ve awa

yina... Beto me bandaka ata fioti ve, na yawu beto lenda sukisa ve. Ya ke kaka—kaka mbote... bantu yikwa ke na kuwa nsatu ya mbote mpenza? Mvwandulu ya Mfumu kaka, oh, la la, ya ke mbote, Mvwandulu ya Mfumu kele awa.

<sup>157</sup> Ntangu yayi, Mvwandulu ya Mfumu kele awa samu na kubelusa bambevo, kusala ti bantu kukuma mbote. Beno kwikila Yandi kaka. Beno me kwikila Yandi? Kana beno lenda kwikila Yandi bima nionso lenda salama. Beno me kwikila yawu? Beno ke kwikila ti yayi ke Mvwandulu ya Mfumu?

<sup>158</sup> Ntangu yayi, na ntangu beno... Beno pesa mwa ntangu fioti, mwa ntangu fioti ntangu yayi, mpe beno widikila na mwa ntangu fioti. Beno bika mu siamisa na beno ti Mpeve-Santu kele awa. Beno bika mu talisa na beno ti Mpeve-Santu, Yina ke na kutuba, Yina ke na kusala mambu, kuzaba yawu. bantu yikwa awa na ntangu yayi, yina kwisaka na kimbevo awa? Beno telemisa maboko ya beno. Muntu yina ke na kimbevo... Ya ke na bantu...

<sup>159</sup> Ya ke na muntu mosi me telema kuna. Nge ke kwikila, tata? Ba kabulaka bakalati ya bisambu ve, kasi nge me kwikila ti Nzambi lenda belusa nge? Nge ke kwikila ti Yandi lenda tuba na munu mpasi ya nge? Ya ke na lweka ya nge. Nge me telema samu ba pasula nge. Ya kieleka. Nkumbu ya nge kele Tata Cartwright. Ya kieleka. Ya kieleka? Pepa diboko ya nge. Mbote mingi. Vutuka na yinzo mpe vwanda mbote, nge ke na nsatu ya yawu ve. Nge me kwikila yawu?

<sup>160</sup> Bakala yina me simba bébé yina na maboko ya yandi, nge ke kwikila ti mu ke kisadi ya Nzambi? Nge me kwikila ti yayi ke Mpeve-Santu? Mu zaba nge ve, ya kieleka? Mu me monaka nge ata fioti ve na luzingu ya munu; beto ke banzenza mosi na yankaka. Nge me kwikila ti Mpeve-Santu lenda tuba na munu yina ke tambula mbote ve na bébé yina? Yandi ke na urticaire. Ya kieleka. Ya kieleka ve? Ya kieleka mpenza. Nge ke vwandaka awa ve. Ve. Nge ke na mpasi ya estomac, nge ke na kubela yawu, nge mosi. Ya kieleka, mutindu yina ve? Nge me katuka na Kansas City. Mbote mingi. Vutuka kuna, Yesu Klisto ke belusa nge. Alleluia! Beno kwikila. Beno me kwikila yawu na ntima ya beno ya muvimbwa?

<sup>161</sup> Tala Wanzio ya Mfumu, yina na zulu ya kento mwa—mwa nzutu ya fioti, kiboba yayi ya lutondo, yina me vwanda na kati awa, yina ke na mpasi ya hernie. Nge ke kwikila ti Nzambi ke belusa nge na hernie yina, mpangi-kento? Nge, na mwa felele ya mbwaki na yimpu ya nge, telemisa diboko ya nge. Mbote mingi. Vutuka na yinzo mpe beluka. Amen. Oh, ya ke Nzambi; ya ke Klisto Mwana ya Nzambi. Yandi me vumbuka na bafwa. Yandi kele awa.

<sup>162</sup> Ntangu yayi, beno tetika maboko ya beno na zulu ya mosi na yankaka mpe beno lutisa ntangu ya mbote na bisambu, mosi

na mosi ya beno, na ntangu mu ke lomba na muntu mosi na kukwisa awa. Kwisa awa, mpangi-bakala. Na ntangu beno me tetika maboko ya beno na zulu ya mosi na yankaka samu na kutalisa ti Nzambi ke belusaka diaka, mu ke na mpangi-bakala mosi awa samu na kusambila diaka. (Beno kwenda na ntwala. Mbote mingi.) Lukumu na Mfumu Nzambi.



*NGE KWIKILA YAWU?* KNG60-0402  
(Believest Thou This?)

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu, na kilumbu ya 2 ya Ngonda ya yiya, na mvula 1960, na Municipal Auditorium na Tulsa, Oklahoma, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)